

HE TUHITUHINGA

NO NGA MAHI A TE HUI O TE HAHU MAORI O TE TAKIWA O TURANGA, ME TE HUI O TE HAHU MAORI O TE TAKIWA O TE KAHA, I WHAKAMINEA KI TE KAHA I TE 7 O NGA RA O TIHEMA, 1885.

NO te Ratapu, no te 6 o nga ra o Tihema i huihui ai nga tangata o te Hui, me te tangata whenua ki Te Kaha-nui-a-Tiki. E wha tekau ma rua i tango i te Hapa a te Ariki; i puta hoki te kohikohi o te Ohaohatanga, £2 8s. 11d.

No te Manei, no te 7 o nga ra o Tihema i huihui ai ano ki te Kaha-nui-a-Tiki i te 10h. 30m. o te awatea. Karangarangatia ana e Te Wiremu, Atirikona, nga ingoa o nga tangata o te Hui, me te whakao ano enei ki o ratou ingoa:—

Minita: Te Wiremu, Atirikona, Rev. Mohi Turei, Rev. Matiaha Pahewa, Rev. Rihara Te Rangamaro, Rev. Rutene Te Aihu, Rev. G. Maunsell, Rev. Irimana Paeta.

Mangai Reimana: Te Irimana Houturangi, Wiremu Te Wharetakeke, Hoani Ngatai, Epeniha Whaikaho, Hori Mata-mua, Te Piriniha Te Rito, Eruera Pahau, Te Hira Tamihere, Piripi Te Awarau, Riwai Pakerau, Te Kereama Kaipara, Karaitiana Ratapu, Rutene Te Arahi, Mihaere Pakuku, Tiopira Korehe, Tipene Tutaki, Ahipene Rangi, Hohepa Karapaina, Te Wiremu Tamahaua, Wiremu Taopuku, Hoera Katipo, Tamati Rangimaewa.

I te mea ka ngaro nei te Pihopa ka riro ko Te Wiremu, Atirikona, hei Upoko mo te Hui. Kii ana e ia kua tu te Hui; timataia ana hoki e ia te mahi ki te Inoi.

Muri iho ka whai-korero ia ki te Hui

WHAI-KORERO A TE UPOKO.

E hoa ma, e nga Minita, e nga Mangai o te iwi:—Taku tuatahi he whakaatu ki a koutou i toku pouri mo te ngaronga o to tatou Pihopa i roto i a tatou tenei ra, kei a ia hoki te tikanga mo te whakamana i ta tatou mahi e whakatu nei i te Hui o te Hahi Maori ki roto ki te Takiwa o Te Kaha, ki te wahi kahore nei ona Hui penei i mua.

Tika rawa tenei kainga hei kawenga mai ma Ngatiporou, ma Rongowhakaata i te Hui o te Hahi Maori; ina hoki ka rima tekau enei tau o te taenga mai o te taua patu tangata a aua iwi ki Toka-kuku nei; he taua ke hoki tenei he whakaora tangata. Ka kitea hoki ki tenei mea te whakakotahitanga a te Rongo-pai i nga tangata katoa hei tinana kotahi i roto i a Te Karaiti. Ma te Atua e manaaki tenei whakaminenga o tatou hei mea e kaha haere ai te mahi a te Hahi ki tenei takiwa, hei mea e whiwhi nui ai te iwi ki te pai.

Kotahi te minita o te tai rawhiti kua tangohia atu e te Ariki i roto i a tatou i tenei tau, ko Kerehona Piwaka, o Whangara.